



Nuuk, juunip 17-at, 2010

Inatsisartut suleriaasiat § 36 immikkoortoq 1 naapertorlugu Naalakkersuisunut imaattumik apeqquteqarniarpunga.

Nuummi aalisartut annertuumik ajornartorsiuteqarput, soorlu makkunangga:

- 1) Sapaatip akunneranut sisamariaannarlutik tunisisinnaatitaapput.
- 2) Tunisinerit tamaasa kiilunik amerlassutsinik aaliangersimasumik taamaallaat tuniseqqusaapput.
- 3) Akit nikeraqaat allannguuteqarajuttarlutillu akikinnermut siumut nalunaarutigineqarsimaneq ajortunik.
- 4) Aalisartut pisatik tunisatik immikkoortitereersimangikkunikkit tunitsivimmiit tunisat tamaasa mikinertut akilersorneqartarput, massa tunisinermi ilitsersuut malillugu tunitsiviup immikkoortitertussaagaluarai.
- 5) Biologit saarullittassiissutissanik innersuussineranit aalisartut immikkoortortaqarfii tusarniarneqarneq ajorneri annertuumik ajornartorsiutigineqarpoq.

Apeqqutigiumavara qulaani ajornartorsiutit taakkartorneqartoq Naalakkersuisunit aalisartunut oqilisaaniarnerminni sutigut iliuuseqalersaarpat, iliuuseqalersaarunillu qaqugu tamanna pissanersoq?

(Inatsisartunut ilaasortaq Aleqa Hammond, Siumut)

Tunngavilersuut:

Ippasaq ataani atsiortunga Upernavimmi eqqaanilu aalisartuaqqat tunitsivissaqarniarput tunngasutigut Naalakkersuisunut kaammattuuteqareernerma kingorna Nuummi aalisartuaqqat saaffiginnissuteqarnerisa kinguneratigut peqqutissaqalerpunga Inatsisartut suleriesaat § 36 immikkoortoq 1 naapertorlugu Naalakkersuisunut apeqquteqarnissannut.

Nuummi aalisartut saarullinnik tunisiniarnerminnut tunngatillugu annertuumik ajornartorsiuteqarput. Ajornartorsiutaasut qulaani taakkartorpakka taakkualu ulluinnarni inuuniarnerminni annertuumik artukkiisutut taavaat inuussutissarsiorniaraluarnerminnilu aporfissarpassuarnik atugaqartinneqarnertik oqaatigaat.

Taamaammat paasiumavara Naalakkersuisuniit aalisartut atugarisaat ajorluinnartut aaqqiiviginarlugit sutigut iliuuseqalersaarnersut aammalu pilersaaruteqarunik suunerinik paasissutisseqqullunga.

Ullut qulit qaangiutsinnagit akineqarnissara kissaatigaara.